

1894

吳都文粹續集



總校官進士臣繆琪

校對官主簿臣汪日贊

謄錄監生臣王寶唐

欽定四庫全書

吳郡文粹續集卷三十五

明

錢穀撰

橋梁

乘魚橋

高啟

橋上西行人橋下東流水遊人如水流朝暮何時已誰
知有飛仙赤腳踏神鯉波警風肅肅渡海秋萬里左招
騎龍君右攜采鸞子笑飡紫雲英同歌蕊宮裏歸來舊
城郭千載一日耳下看橋上人還隨雞鳴起去者已如

灰來者猶如蟻不解養谷神紛紛自生死

同前

周南老

范陽水府仙脚踏赤鯁公乘之過此橋飛昇凌太空御
氣鼓兩翼飄飄雲霧中魚化仙已遠橋影架晴虹泠泠
橋下水隨風自西東仙鱗或來迎誰與巧相逢

同前

王賓

此處正當城市裏誰知轉眼到蓬萊如今不見真仙過
那得神魚再起來

重建夏侯橋記

潘夢旂

六飛駐浙吳為輔藩地望崇重視昔有加井邑阜繁於
今為最郡治稍西橋曰夏侯以地有夏侯廟得名締創
于皇祐壬辰重修于紹興辛未刻于壁記于志可攷僅
此無他聞焉水環樓堞陸帶闌闔左奉臺府旁聯宮寺
右亘蘇館次列津侯糟丘鎮乎其首醴庾濱乎其腹人物輻
輳使客旁午飛轂馳轡曳裾躡履交往迭來必由斯橋
曉鼓未作聲迹嘈雜夜漏未半暫止復動歲久而敝非

兩馬力將持厥危非一木支寶慶初元邦人相率出力
改作使守嘉其志悉捐金以助遠近翕爾而應乃命工
師課負程具木石以仲秋癸丑撤其故而新之下則疊
石為址剡內直外如植半圭護以連楹兩岼對起而合
以梁上則鋪石甃面空中偃端如浮脩眉翼以扶闌兩
廂互應而接於遠明年七月工以訖告大容九軌高納
巨船不峻而隆不削而垂遠而望之巍巍乎其崇近而
履之坦坦然其夷厥材孔良厥砌孔堅足以閱千祀而

不朽矣夫自行都抵京口渡維揚直都梁臨中原咸有
通溝貫城以行運艦長虹跨水以便徒趨然其源泉併
為一川架波取道無幾惟吳呼吸具區灌注五門曲河
旁達䟽派且有飛梁錯峙與岐俱多輿轡經隧樓帆過
肆左賦美之夜市菱藕春船綺羅韋詩詫之其流所以
聚故民愿而富其水清且泚故俗粹而美橋梁道路責
在有司吳人尚義爭出已私閭里興修歷歷可舉茲橋
底績其有自哉僕生于吳舉于吳隨牒四方三十年未

嘗一日忘父母國甫入都故老貽書述斯後俾作記忻
然諾之庶幾登名於碑他日歸老能從容乎其所若勸
施位名金穀品目列之左不復書寶慶二年七月朝散
郎郡人潘夢旂記

夏侯橋相傳夏侯司空建或云橋旁有夏侯廟故名

烏鵲橋

楊備

月滿星移水照天南飛烏鵲影翩翩雖然上属斗牛分
不為秋河織女填

同前

高啟

烏鵲南飛月自明
恨通銀漢水盈盈
夜來橋上吳娃過
只道天邊織女行

同前

周南老

古有烏鵲館橋名
因館舊烏鵲己南飛
影落蒼石竇彷彿
霓橫空知是何年構
往來頻送迎女牛
曾邂逅銀漢秋逾
高靈槎莫予覲愧
非濟川才欲進不可又

烏鵲橋在吳縣東古有烏鵲館因名白樂天詩云烏

鵲橋紅帶夕陽

顧家橋

王賓

水落沙虛古岼斜垂楊幾樹有慈鴉將軍孝行宜旌表
獨見橋名稱顧家

顧家橋在樂橋東孫權虎頭將軍顧悌家馬悌在官
得父書洒掃設几筵拜跪讀之居父喪痛不見父終
哭泣未闋服卒

百口橋

王賓

百口橋邊春日斜
舊時開遍紫荊花
山東人說張公
藝此是中吳顧訓家

百口橋在婁門西
東漢顧訓五世同居
百口同爨故名
訓歲朝會集行酒子
孫三歲以下皆知位
次故又名試飲橋

孫老橋

王賓

白傅經營年紀衰
蕭蕭白髮滿頭絲
孫公管領來修葺
又在衰年白髮時

皋橋

皮日休

皋橋依舊綠楊中
閭里猶生隱士風
惟我到來居上館
不知何道勝梁鴻

同前

陸龜蒙

橫絕春流架斷虹
憑闌猶想五噫風
今來未必非梁孟
却是無人繼伯通

同前

楊備

隱士貧居日賃舂
物情歌在五噫中
釵荆舉案何人識

猶賴橋邊有伯通

同前

高啟

閭門啼早鴉拂面見飛花綠水通鰭舫紅橋過犢車誰
尋伯通宅只問泰娘家

同前

周南老

漢郎臯伯通卜居近西城門前橋窵兀時以臯為名大
橫當孔道來往人營營伯鸞操井臼衆中為歡迎豈惟
隱士賢乃貴知人明二賢久已矣問橋猶有徵

同前

王賓

伯通家久沒橋邊有姓依橋尚遠傳非是偶然人記取
緣他知得伯鸞賢

重建虹橋記

虞集

吳都內外皆鑿溝澮納太湖之水以行舟逾絕為梁經
緯聯屬其高庫修縮視水大小獨虹橋在郡閭門西跨
官河通驛道為咽喉要處水至橋下匯為回淵折而東
行勢用剽悍橋舊植以木而加斲歲久腐橈乃今夏大

霖雨遂壞水陸並阻民吏憂騷縣長吏計會役大懼不
即成郡人鄧文貴詣官自言架木非久計請出家財以
成之遂以八月乙丑召工畫圖盡撤其舊而新之絕水
下石欵密鍵固纍起拱合理緻無間下通圜空涵水象
月引重過之堅逾寔地泰定元年十月成凡用中統鈔
十五萬貫云夫鄭商犒牛敵謀遙沮卜式輸財漢用不
匱以一民而專有司之美不可無書也故為備載不辭

同前

黃潛

泰定二年冬十有二月平江閭門外新作虹橋成古者
辰角見而除道天根見而成梁有司之事耳春秋常事
不書此何以書在有司常事也而此非有司常事者也
按郡志橋之載于圖籍者三百五十九而為虹橋者三
其一在城西若干步即此橋也去年夏大雨水暴溢橋
居兩水之交莫能與水抗一夕盡圯其地適控通衢徵
令賜予布政于遠方或奉貢輸賦為行者病謀所以復
其故而官帑不可輒發又重以其役厲民未知費所出

郡內民人鄧文貴請分家貲之半更為石橋以利永久
既又以為此有司者之事非細人所得干也乃飭財用
庀工徒以聽要束焉遂以八月乙丑始閱八甲而告訖
功橋之修四百尺而其高十分修之一五分而殺其二
乃與岍等脊之廣得高之半而趾之廣加其什五上設
扶闌為之備怯其下為門如半月以醺漕河而隄其兩
垂以度輓者所用錢以緡計者十二萬五千有奇役以
庸計者二萬四千有奇今總管郭公既率僚屬觴酒橋